

書

宛陵先生文集卷第四十九

寄題絳守園池

寄題絳守園池

老柏麝不食。古色侵青冥。淺沼龍不入。秋水生浮萍。屋
屢圯。堊幾太守。壁上彪蔚遺丹青。黑石鐫辭澀如棘。今
昔往來人不識。酸晴欲挾無聲形。既不可問不可聽。懸
泉瀉竇晝未停。飛玉貯藍光入屏。苞潭梁島甲癸丁。蔓
刺交綴垂組紕。蒼官鬣槐朋在庭。風蟲日鳥聲嚶嚶。卉
葩木果黏枝條。集臺脫熱昏痾醒。文韓詩怪若是徑。
取一二傳優伶。仍寄河東薛太守。更與斟酌無閑局。

陸子履見過

劉郎謫去十年歸。長樂鐘聲下太微。屈指故人無曩日。

平明騎馬扣吾扉。論情論舊彈冠少。多病多愁飲酒稀。
猶喜醉翁時一見。攀炎附熱莫相譏。

○ 重送周都官

水上朱樓畫角鳴。濛濛雨裏榜舟輕。未逢甫里先生謁。
多見吳興太守迎。荷葉半黃蓮子老。霜苞微綠橘林明。
十年不到風煙改。君去將詩與畫評。

○ 送李載之殿丞赴海州權務

瓜蔓水生風雨多。吳船發櫂唱吳歌。槎從秋漢下應快。
人憶故園歸奈何。世事靜思同轉轂。物華催老劇飛梭。
茶官到有清閑味。海月團團入酒罍。

○ 和吳沖卿學士石屏

吳夫子。佩銀龜。乘天馬。素怪奇。忽得號畧一片石。其中
白色圓如規。又有樹與鳥。畫手雖妙何能為。吳乃持問
歐陽公。比公曩獲尤可疑。疑不為辨賦以詩。詩辭粲粲
明星垂。復遣齋來使我和。坐上鉅公旁。睨之。范侯寔有
揚雄學。咸云此理難究推。我歸滌慮反覆思。義雖不經。
聊解頤。月與太陽合。朔時陽鳥飛。上桂樹。枝枝上作窠。
生羣兒。人不知天公。天公欲俾世間見。影著石面如黏。
竊烏既不得去。月亦不可移。留為千古作好玩。慎勿傾

樸同玉碑。

時在唐書局與歐陽永叔王原叔范景仁會食得所示詩

永叔贈絹二十匹

鳳皇拔羽覆鶉鷄。鶉鷄幸脫僵蒿蓬。昔公處貧我同困。

我無金玉可助公。今公既覺我尚窘。公有縑帛周我窮。
古來朋儕義亦少。子貢不顧顏淵空。復聞韓孟最相善。
身仆道路哀妻僮。生前曾未獲一飽。徒說吟響如秋蟲。
自驚此贈已過足。外可畢嫁內禦冬。况無杜甫海圖圻。
天吳且免在褐躬。瘦兒兩脰不赤凍。病婦十指休補縫。
廚中餒婢喜有望。服鮮弃垢必所蒙。梁上君子切莫下。
吾非陳寔何爾容。

依韻奉和永叔感興五首

泉上有君子。齋祠達主誠。向來霖雨暴。觸處蛟鼉鳴。既
祈致日出。杲杲紓民情。天子遣以報。固匪媚取名。因成
感興章。庶用語平生。蹈道久已熟。情田不須耕。

既負天下望。必憂天下責。每聞諫諍辭。苦意多矯激。心
存義勇赤。氣與虹霓白。所論言必從。豈若水投石。陰邪
日已銷。事理頗已得。莫將經濟術。抑鬱向胃臆。

勿驚年齒遲。勿歎時節晚。寒松翳林麓。射干生隴坂。野
蓬隨飄飄。秋實綴纂纂。萬物更盛衰。有益必有損。損益
皆自然。曷增鳧脰短。人為智慮役。白髮安得免。利澤欲
及時。唯恐不行遠。後世豈皆愚。計校徒勉勉。

日出各馳趨。皆為利所迫。秋蟲至微物。役役網自織。古
來高世人。林下遺憂責。扛鼎絕臏者。乃自恃以力。積金
苟如山。何異魚貪食。

唧唧復唧唧。長沙何太息。秋風入破衣。瘦婦思補刺。手

中把長線無帛縫不得。夜夜憂向寒。斗柄漸垂北。嫁夫欲夫富。歡樂要終極。歡樂既未能。鬢髮霜花易。

依韻奉和永叔社日

玉卵不吞龍嗜肉。燕子成兒去華屋。老櫪半黃田鼓鳴。樹下宰平誰似玉。茂陵常說泣秋風。王母惜傳雙鬢綠。東方伏日思早歸。長飢不及侏儒腹。豮豕新烹白醪熟。奮衣地坐無拘束。驪山夜寒坑底哭。漫把漆書留豕竹。

社日飲永叔家

雨未雨濛濛。野田擊鼓賽社翁。折條跨馬社翁去。醉叟臥倒黎葉紅。遨頭主人邀客飲。玉酒新賜蓬萊宮。彭宣不預後堂會。康成一舉三百鍾。更邀明月出海底。爛醉

等是歸蒿蓬。

八月十三日觀長星

長星彗雲出。天狗欲墮鳴。狗埽不見跡。昭昭河漢橫。河漢秋轉淨。箕斗垂光晶。勸爾長星酒。收稜看太平。

送李才元學士知邛州

太守車煌煌。莫如還故鄉。昔登蜀郡籍。今得臨邛章。過家禮耆舊。接境跪壺漿。寒經道路遠。春入山川長。俗將樂其化。詔亦美其良。相如有遺跡。誰復酒壚傍。

弔仲源

世家吳季子。皇籍漢諸孫。嘒管行車失。虛堂隱几存。枝摧從玉樹。星隕自天垣。寧復下貧賤。停驂來里門。

送梁學士知襄州

騎吹荆州去。喬林漢水前。鄉亭逢故老。牛酒問高年。翠巘臨關路。黃柑逐賈船。習家池館在。賓從與留連。

送薛氏婦歸絳州

在家勗爾勤。女功無不喜。既嫁訓爾恭。恭已乃遠恥。我家本素風。百事無有侈。隨宜具奩箱。不陋復不鄙。當須記母言。夜寐仍夙起。慎勿窺窗戶。慎勿輒笑毀。妄非勿較競。醜語勿辨理。每順舅姑心。况逆舅姑耳。為婦若此能。乃是儒家子。看爾十九年。門閭未嘗履。一朝陟太行。悲傷黃河水。車徒望何處。哭泣動鄰里。生女不如男。天親反由彼。

送劉繼鄴秀才歸當塗

鷓鴣始出巢。欲矜五色羽。乃見郡鴟盤壤中。將有取梧桐。與竹實。安得在平土。所趣固已殊。而何不遠舉。幸失網羅目。宜還蘭蕙圃。故鄉有嘉林。其下可以處。會侍朝陽鳴。賀夔成律呂。

送裴如晦宰吳江

吳江田有杭。杭香春作雪。吳江下有鱸。鱸肥膾堪切。炊杭調橙齏。飽食不為餐。月從洞庭來。光映寒湖凸。長橋坐虹背。衣濕霜未結。四顧無纖雲。魚跳明鏡裂。誰能與子同去。若秋鷹掣。

送撫州通判袁世弼寺丞

帆疏疏。織綠蒲。二十四幅輕江湖。高秋逆水上天去。朝
過瓜步暮濡須。長風沙頭問鯉魚。大孤山側鳴寒鳥。魚
腹無書報家信。憑烏為到西山區。西山松柏應更好。及
取之官來拜埽。

○送石昌言舍人使匈奴

燕然山北大單于。漢家皇帝與璽書。持書大夫腰金魚。
飛龍借馬出國都。胡沙九月草已枯。草上霜花如五銖。
白裘貂帽著不暖。莽莽黃塵車款款。野廬邊月出隴來。
風靜天遙鴈聲短。聞到蜀庭尤苦寒。譯言揉耳不譏彈。
公於是時已觀禮。踏雪再拜辭可汗。

依韻和宋中道觀八月二十八日車駕朝謁景

靈宮

都人夾望禁槐傍。閭闔初來旭日光。彫玉翠鞍牽騶裊。
盤龍朱輦爛文章。焚香闕殿開嚴帳。汲冰寒溝灑廣莊。
一見天顏萬人喜。却迴宮禁樂聲長。

○度支蘇才翁挽詞三首

子美同葬

二十識君貌。交游非一朝。魄光沉碧海。志業隕青霄。洛
客舊為社。楚人今作招。素車京峴路。應不似焦堯。
盛世雖多士。唯公與衆殊。高才飛健鶻。逸句吐明珠。未
入周官采。爭持楚璞模。莫悲泉骨朽。青史見賢愚。
自昔愛春物。樽深眼底紅。日斜花在落。身醉客西東。歎
歎千年隔。生悲百事空。君嘗知此理。不悞學陶公。

重送袁世弼

臨川內史謝康樂。貝葉翻經有故臺。春草生塘猶夢句。秋蕖出水似君才。駮雞肥脆聊供膳。芻酒甘濃可薦杯。亦說右軍遺蹟在。墨池科斗喜風雷。

留題景德寺吉祥講僧

我講異爾講。我書非爾書。彼將希白馬。此亦猶大車。皆行國都內。轍不入委閭。世人日擾擾。來慕清涼居。

閤門水

朝堂嘉祐元年九月九日宿齋歐陽永叔張叔之孫之翰命賦

宮井固非一。獨傳甘與清。釀成光祿酒。調作太官羹。上舍銀餅貯齋廬。玉茗烹相如。方病渴空聽。轆轤聲。

朝堂宿齋

玉屬陪祠日。宮廬寓宿時。鍾來建章遠。月過羽林遲。寒入青綾被。風牽翠鳳旗。賈生誰復召。安問鬼神為。

送杜挺之郎中知虔州

大庾嶺邊無臘雪。惟有梅花與明月。月光如水來向人。太守得閑杯耳熱。吹香入酒望梁宋。正是苦寒縣可折。亦當念君君行南。南方無冰地不裂。此身不到五侯門。肥羔釀酒槐槽咽。玉色少年生頰春。解笑吟腸冷如鐵。衝風冒霰入廣文。老與諸生開反切。重嗟君遠隔江湖。雖得豐甘牙已缺。官娥執樂一千指。脩頸慢肌衣錯纈。定逢賓客彊排娣。舞徹六么紅袖掣。人競羨君君愈疲。夜歸坐閤思子說。

送吳辯叔知鞏縣

言為西邑宰。本是洛陽人。送驛往歸魏。迎車來入秦。山川成鞏固。陵廟壯威神。好學河陽政。栽花作縣春。

當世家觀畫

冰蠶吐絲織纖紈。妙娥貌入玉輕邯鄲。曲眉淺臉鵝髮。盤白角瑩薄垂肩。冠銅青羅衫。日月團紅裙。撮暈朝霞。乾手中把筆書小字。字以通情形。以觀形隨畫去。能長好。歲歲年年應不老。相逢孰識眼生春。重伴忘憂作萱草。

送韓僉判玉汝還南京 持賀太禮表

天子甘泉祀。歡聲浹九圍。綠章馳騎入。朱服佩魚歸。賦

雪上賓席。買鬣更舞衣。清池無限鴈。莫道信音稀。

宛陵先生文集卷第四十九

宛陵先生文集卷第五十

桃花源詩

并序

嘉祐元年予在京師邂逅與都官員外郎張侯顯遇于書肆中張語往時相識於唐俞家今二十三年矣因各言出處張曰實居武陵武陵舊蹟可具道始時陶潛為記與詩其後往往賦詠不絕君之仲父昔嘗有作聞君能詩多為公卿大夫諷誦願得一章夸咤遠土亦當買石刊置巖下既重其意許其錄幼時所為五言歸閱故橐則頗不愜心遂別為一章以塞張侯之請

鹿為馬龍為蛇鳳皇避羅麟避置天下逃難不知數入海居巖皆是家武陵源中深隱人共將雞犬栽桃花花

開記春不記歲。金椎自劫博浪沙。亦殊商顏采芝草。唯與少長親胡麻。豈意異時漁者入。各各因問人間賒。秦已非秦孰為漢。奚論魏晉如割瓜。英雄滅盡有石闕。智惠屏去無年華。俗骨思歸一相送。慎勿與世言雲霞。出洞沿溪夢寐覺。物景都失同迴槎。心寄草樹欲復往。山幽水亂尋無涯。

永叔席上分韻送裴如晦

得黯字

霜華夜夜濃。汴水日日減。行邁唯恐遲。離懷不須黯。遠輕吳江潮。乃見丈夫膽。君意應洗然。吾方困塵慘。

永叔白兔

可笑嫦娥不了事。走却玉兔來人間。分寸不落獵犬口。

滁州野叟獲以還。霜毛茸茸目睛殷。紅絲金練相繫掇。馳獻舊守作異玩。况乃已在蓬萊山。月中辛勤莫擣藥。桂傍杵臼今應閑。我欲拔毛為白筆。研朱寫詩破公顏。

直宿廣文舍下

前夜宿廣文。葉響竹打雪。昨夜宿廣文。窗影竹照月。賴此數竿竹。與我為煖熱。上有寒鵲棲。拳足如瘦蕨。平明欲飛去。喑喑若告說。我無喜可報。煩爾弄背舌。亦嘗苦老鷄。鳴噪每切切。為學本為道。窮蹙令素髮。但能得酒飲。終日自兀兀。

送宋中道太博倅廣平

行役無冬春。車馬無南北。急若機上梭。離別腸自織。其

間走聲利。晝夜不能息。晚得二友生。胸覬吐五色。各思
強祿仕。安肯坐仰食。一之毛遂鄉。一之太伯國。豈無穎
脫才。可邁古風力。明當隔大河。去路指斗極。誰念平原
君。能於衆中識。裴如晦時亦宰吳江

送宋端明知成都

其兄相國新鎮河陽

伯仲俱邦棟。朝廷倚以隆。出爲周九牧。入是漢三公。歲
易星辰轉。天均雨露同。威聲滿河北。事業出山東。賦壓
臨邛馬。文高益部雄。英靈當自伏。教化已先通。穀騎花
川隘。壺漿錦里空。道塗來笮馬。都邑賚郛筒。刀夢殊祥
後。鋒車急占中。春江須愛賞。花鳳在梧桐。

戲作嫦娥責

我昨旣賦白兔詩。笑他嫦娥誠自癡。正值十月十五夜。
月開冰團上東籬。畢星在傍如張羅。固謂走失應無疑。
不意嫦娥早覺怒。使令烏鵲繞樹枝。啾噪言語誰可辨。
徘徊赴寢褰寒帷。又將清光射我腹。但覺軫粟生枯皮。
乃夢女子下天來。五色雲擁端容儀。雕瓊刻肪肌骨秀。
聲音柔響揚雙眉。以理責我我爲聽。何擬玉兔爲凡卑。
百獸皆有偶然白。神靈觸冒由所推。裴生亦有如此作。
專意見責心未夷。遂云裴生少年爾。謔弄溫軟在酒卮。
爾身屈強一片鐵。安得妄許成怪奇。翰林主人亦不愛。
爾說爾猶自惜。知不知。叩頭再謝沈已去。起看月向西
南垂。

送李涇州審言二首

古章乘一障。不過提千兵。今握數萬衆。獨自制名城。諸將俯聽命。莫敢輒吐聲。堂下選驃裊。帳中圖崢嶸。山川在目中。虜寇來必平。誰人識謝艾。只是一書生。漢家舊日回中路。天子新除太守行。牙將握刀趨遠驛。羌人下馬拜高旌。雲間白草開邊隴。山上朱樓墜郡城。勇脫區區簿書內。壯心應欲請長纓。

送刁景純學士使北

嘗聞朔北寒尤甚。已見黃河可過車。驛騎駸駸持漢節。邊風慘慘聽胡笳。朝供酪粥冰生椀。夜臥氊廬月照沙。侍女新傳教坊曲。歸來偷賞上林花。

送馬仲塗司諫使北

每逆龍鱗司諫諍。又持旄節使陰山。貂裘不見風霜勁。鴈磧遙知道路艱。冰膾芥齏非楚味。玉茗蘭茁說燕顏。單于不敢輕中國。名馬新調為送還。

重賦白兔

永叔云諸君所作皆以嫦娥月宮為說頗願吾兄以他意別作一篇庶幾高出羣類然非老筆不可

兔氏穎出中山中。衣白兔褐求文公。文公嘗為穎作傳。使穎名字存無窮。徧走五嶽都不逢。乃至琅邪聞醉翁。醉翁傳是昌黎之後身。文章節行一以同。滁人喜其就。籠絀遂與提攜來自東。見公於鉅鼇之峰。正草命令辭。如虹筆禿願脫冠。以從赤身謝德歸蒿蓬。

王祁公北園

園林多高樛園卉多芳柔紅紫經幾春青枯經幾秋我
至每懷浮觴之卿翁但見浮觴之水汨汨流水流日夜
曾未休高門世世生賢侯不比平泉碑缺花木記又非
家鷓嘯鳳皇樓洛陽城中亦有園與宅常同歐陽翰林
攜酒遊竹間池館遺翠羽戶外楊柳繫紫騮今嗟齒似
舊屐作博士嘉趣只與心相仇彊騎瘦馬往城北二十
三年如轉頭歸來作此辭且應主人求

○ 觀揚之美盤車圖

谷口長松葉老瘦澗畔古樹身枯高土山慘愴遠復遠
坡路曲折盤車勞二車迴正轅接軫繼下三車來嶷嶷
過橋已有一乘歇解牛離軛童可哂黃衫烏巾驅舉鞭

經險就易將及前轂輪傍側輻可數蹄角挽錯卷箱聯
古絲昏晦三尺絹畫此當是展子虔坐中識別有公子
意思往往疑魏賢子虔與焉皆妙筆觀玩磨滅窮歲年
塗丹抹青尚欺俗旱龍雨日猶賣錢是亦可以祕疑亦
不可捐為君題卷尾願君世世傳

寄許越州

開元冠蓋裏無若賀知章乞得鏡湖水洗出明月光行
坐鏡與月身衣羽人裳心存黃庭經目視白鳥行歲時
忽已古高韻抗彭莊今聞許子春來守稽山傍稽山風
月在鏡水菰蒲長臘市開梅萼霰雪凌早芳臥龍生茗
舌鼓角催新陽焙邊可以啜樹間可以觴賀老於當日

必定無此嘗。唯有李白詩。酒船芙蓉香。安得效白也。賸載借餘艖。與君同醉翁。智慮收肝腸。

永叔請賦車螯

素脣紫錦背。漿味墜蚶菜。海客穿海沙。拾貯寒潮退。王都有美醞。此物實當對。相去三千里。賢力致以配。翰林文章宗。炙鮮尤所愛。旋圻旋沽飲。酒船如落埭。殊非北人宜。肥羊啗鸞塊。

寄題郢州白雪樓

楚之襄王問於宋玉。玉時對以郢中歌。歌為白雪陽春曲。始唱千人和。再唱百人逐。至此和者纔數人。乃知高調難隨俗。後來感槩起危樓。足接浮雲聲出屋。中古客

應無。怊悵鯢魚孟諸宿。樓傾復構春。又春酒瀉琉璃烹。錦鱗青山繞欄看。不盡眼穿盪漿石城人。去知何在寒花雨。斂自生。嘖。今聞太守新梁棟。試選清喉可動塵。

和永叔荅劉原甫遊平山堂寄

黃土坡。陔岡頂寺。青煙幕。歷浙西山。半荒樵牧舊城下。一月陰晴連嶼間。人指廢興都莫問。眼看今古總輸閑。劉郎寄詠公酬處。夜對金鑾步輦還。

平山堂留題

蜀岡莽蒼臨大邦。雄雄太守駐旌幢。相基樹楹氣勢厖。千山飛影橫過江。峰嶠俯仰如奔降。雷塘波小灘鶻雙。陸羽井苔黏瓦缸。煎鐺瀉頂聲淙淙。雨牙鳥爪不易得。

碾雪恨無居士龐已見宣城謝公陋吟看遠岫通高窗

送張子卿秀才 公武

茫茫九土中天網該時秀有鳳不收羅有麟不獲狩賢
豪為咨嗟都邑誦瓊琇而我當是時欲見恨未遑忽過
廣平居遇子乃邂逅懷中二新篇幸出洗昏瞶一美韓
公才 稚圭也 一語南方寇鏗然青琅玕交夏風雨驟輒用告
衆多亦未甚便售固知至珍物不入市井貿昨朝驚扉
鳴始悟子來扣鉅編高貯襟細卷仍函袖麻衣踏屣屨
再拜謹以授因之重感愴世德實有舊文體古為徒家
聲喜能又其間贊愚辭愧累將恐詬磨拂李杜光誠與
日月鬪退之心伏降安得此孤陋豈能造春榮豈解易

星宿一身猶寒飢生未飽藜豆高高河漢流肯下饋湔
漱蟲魚儻無施捉撮不乖繆聊此慰窮愁文章終莫就
庭前枯石榴寒雀並清晝逍遙獨詠歌寄翼與報訓

江鄰幾學士寄酥梨

興平烹瓊乳咸陽摘冰枝秦女點山日張公開谷時刻
破玉漿壺泛融金酒卮適從關中寄不見博士界

荅劉原甫寄糟薑

名國萬家城千畦等封侯斲當燕去前醃牙費糟丘無
筋偃王笑有味三閭羞寄入翰林席聖以不撤優又寄
蓬門下作賦誰肯休唯我廣文舍免為齏鹽仇劉公漢
家齋才學歆向儔曾懷飽經史辨論出九州曾不奉權

賢但與故人投贈辛非贈甘此意當自求

銅雀硯

歌舞人已死。臺殿棟已傾。舊基生黑棘。古瓦埋深耕。玉質先骨朽。松棟為埃輕。築緊風雨剝。埏和鉛膏精。不作鴛鴦飛。乃有科斗情。磨失沙礫粗。扣知金石聲。初求畎畝下。遂廁几席清。入用固為賢。論古莫與并。端溪割紫雲。空負世上名。韓著毛穎傳。何獨稱陶泓。儻以較歲年。泓當視如兄。

歐陽永叔王原叔二翰林韓子華吳長文二舍

人同過弊廬。值出不及見。

十二月七日

枯竹為門扉。不可容車騎。况如鄭廣文。無檀藉賓位。窮

冬月破七。賢客聯玉轡。傳騶肅里閭。下榻呼童稚。問我何所往。共留牆上字。兒愚不知誰。金章言照地。既屈卿大夫。恨莫親帝筵。星躔回已高。麟趾寧復至。戢戢鄰巷居。相見竊自喟。豈料瘦老翁。能令賢達至。昔時蓬蒿徑。安有此盛事。

元忠示胡人下程圖

單于獵罷臥錦紅。解鞍休騎荒磧中。蒼駒騶駱六十四。隱谷映坡分尾鬣。九馳五牛羊頗倍。沙草晚牧生寒風。賢賤小大指五百。執作意態皆不同。二鷹在臂二鷹架。駿大當對寧爭功。羶廬鼎列帳幕擁。鼓角未吹驚寒鴻。土山高高置烽燧。毛囊貯獲閑刀弓。水泉在側挹其上。

長河杳杳流無窮。素紈六幅筆何巧。胡瓌盡妙誰能通。今日都城有別識。別識共許劉元忠。

送李太保知儀州

出塞開牙帳。論兵啓玉鈴。漢泉思白馬。秦冢弔蒙恬。族本西山大。聲從渭北兼。相如嘗學劍。文士亦何嫌。

劉元忠遺金橘

南方生美果。且體橘包微。韓彈有輕薄。楚萍知是非。甘香奉華俎。咀嚼破明璣。欲換齏鹽腹。盈匱忽我歸。

王原叔內翰宅觀山水圖

石蒼蒼。連峭峰。大山嵯峨雲霧中。老松瘦樹無筆蹤。巧奪造化何能窮。古絹脆裂再黏續。氣象一似高高嵩。上

有荆浩字。特歸翰林公。願換廷圭一丸墨。誰言賣錢須青銅。范寬到老學未足。李成但得平遠工。黃金白壁未為寶。文人師臣無不通。

送瘳倚歸衡山

倚來為其兄求集序於歐陽永叔

雌猿夜啼別湘東。曉尋故人背孤桐。孤桐有聲彈不響。絃絕曲在埋蒿蓬。知音萬古期必逢。今日已聞天下雄。陟山涉水不辭遠。文章大名居禁中。扣門一見顏色喜。抱琴三歎含徵宮。九疇不汨微禹力。堯舜豈無明與聰。推根致本賢意合。敘述况值太史公。買金得玉莫忘寶。却過洞庭乘朔風。猿休啼。月月色好。還來舊山伴狙翁。

宛陵先生文集卷第五十

宛陵先生文集卷第五十一
還吳長文舍人詩卷

松液花茯苓。又因為琥珀。遇物必得形。毛髮曾不隔。君子亦豹變。其文蔚可覲。个者逢吳侯。滿腹貯經籍。噴吐五色霓。自堪垂典冊。詩教始二南。皆著賢聖跡。後世竟翦裁。破碎隨刀尺。我輩彊追仿。畫龍成蜥蜴。有唐文最盛。韓伏甫與白。甫白無不包。甄陶咸所索。侯初守二郡。山水多助益。升高觴嘉賓。賦筆速鷹翻。葺書成大軸。許我觀琮璧。真物固易辨。恨無百金易。借從懷袖歸。誦玩廢朝夕。譬如遊國都。惝恍失阡陌。苦吟三十年。所獲唯巾幘。豈比夸受降。甲齊熊耳積。重見元和風。珠玉敵海

舟自慙寒餓爲何張空避席。

和正月六日沈文通學士遺溫柑

禹書貢厥包。未知黃柑美。競傳洞庭熟。又莫永嘉比。適
觀隱侯詩。獲此殊可喜。誦句擘露囊。香甘冷熨齒。明朝
鑊禮闈。何暇醉鄰里。

史供奉羣鶴

出珥銀貂侍太清。迴看雙鶴舞中庭。翩翩曾是仙人驥
兩兩尚儀君子形。靜夜欲還緱嶺月。終朝思唳太湖萍。
莫將樹上雞相並。會待歸飛向杳冥。

雪竇達觀禪師見寄依韻答

巖竇常留雪。山雪不有心。禪衣百衲重。香刹四明深。馴

鹿來銜果。栽松去作林。自緣冠紱累。未解遠公尋。

和孫端叟寺丞農具十三首

田廬

結廬野田中。其高足以覘。坐臥劣自容。巢棲未嘗斂。但
能風雨蔽。何惜茅蓬苦。終當收穫畢。寂寞懸山店。

颺扇

田扇非團扇。每來場圃見。因風吹糠粃。編竹破筠箭。任
從高下手。不爲暄寒變。去麤而得精。持之莫肯倦。

樓種

農人力已勤。要在布嘉種。手持高斗柄。背瀉三犁壠。月
下叱黃犢。原邊過廢冢。安知俠少年。玉食金羈擁。

樵斧

適從伐枯桑。莫悟刀已缺。蠶工向欲迫。田事不可徹。丁
丁背谷聲。役役持柯熟。積薪高於山。焉用先後別。

耒耜

古聖通物宜。揉斲資粒食。稼穡盡民勤。墾耕窮地力。推
化本神農。維時思后稷。我老欲歸田。茲器已先識。

錢鎛

詩稱序錢鎛。南畝興農作。寧唯務芟雉。豈不在刈穫。收
功尚嘉穀。託用隨芒屨。太平茲所重。坐見銷鋒鏑。

耨鉏

蕪穢或不治。良苗安得長。薈來露未晞。荷去月初上。侵

煙濕鵝頸近。芟翻蟻壤生。具自有餘何。醉汗霑纈。

襪

上襪與下襪。青蓑苦能織。曉披春雨來。晚曬陽披側。蔽
身常自足。衝濕曾為得。任從野風吹。已敵寒蓬色。

臺笠

力田冒風雨。緝籜為臺笠。寒蓑相與用。陰野低迷入。足
屨固易濡。鬚葆何嘗濕。斯須未可去。赫日實乃急。

水車

既如車輪轉。又若川虹飲。能移霖雨功。自致禾苗稔。上
傾成下流。損少以益甚。漢陰抱甕人。此理未可諗。

田漏

瓦罌貯谿流。滴作耘田漏。不為陰晴惑。用識早暮候。辛
勤無侵星。簡易在白晝。同功以為準。一決不可又。

耘鼓

挂鼓大樹枝。將以一耘耔。逢逢速遠近。汨汨來田里。功
既由此興。餉亦從此始。固殊調猿猴。欲取兒童喜。

牧笛

牧人樂下牧。背騎吹短笛。聲穿吳雲低。韻入楚梅的。誰
嗟苦調急。自與幽意寂。應同堯時民。歌將土壤擊。

和孫端叟蠶具十五首

繭館

漢儀后親蠶。採桑來繭館。雲母飾車上。鈎籠載車畔。援

條露已乾。受葉日將晏。為言天下婦。茲事不可慢。

織室

常聞漢皇后。織室數來觀。宮女豈不勤。帝袞得以完。亦
將成纁黃。非用競龍鸞。意在奉宗廟。後人其可安。

桑原

原上種良桑。桑下種茂麥。雉雒麥秀時。蠶眠葉休摘。空
條漏日多。餘樵更誰惜。會待黃落來。酒壚燒斗石。

高几

桑柔不倚梯。摘桑賴高几。每於得葉易。曾靡憂枝披。躋
陞類拾級。下上異緣蟻。閑置草屋傍。鳴雞或棲止。

科斧

科桑持野斧。乳濕新磨刃。繁柝一去除。肥條更豐潤。魯
葉大如掌。吳蠶食若駿。始時人謂戕。利倍今乃信。

桑鉤

長鉤扳桑枝。枝間挂桑籠。南陌露氣寒。東方日光動。少
婦首且笄。幼女角已懸。競以採葉歸。曾非事梳櫛。

桑筥

采采向桑郊。盈盈自持筥。挂鉤帶月往。穉葉和煙貯。一
心恐蠶飢。搔首促儔侶。到家傾嫩綠。刀几為哎咀。

蠶女

自從蠶蟻生。日日憂蠶冷。草室常自溫。雲髻未暇整。但
采原上桑。不顧門前杏。辛苦得絲多。輸官官莫省。

蠶簇

冰蠶三眠休。作繭當具簇。漢北取蓬蒿。江南藉茅竹。蒿
疎無鬱浥。竹淨亦森束。競畏風雨寒。露置未如屋。

蠶植

三月將埽蠶。蠶妾具其器。丘植先拈音摘括。辟室亦塗墍。
衆材疎以成。多薄所得寄。終老歸簇時。應無慙弃置。

蠶薄

河上緯蕭人。女歸又織葦。相與為蠶曲。還殊作筠篚。入
用此何多。往售獲能幾。願豐天下衣。不歎貧服卉。

繅盎

朝漬一盎繭。繅就幾絢絲。絲成繭已盡。盎亦誰復持。道

上有隋甌車。倘有鴟夷二物。且莫笑。顧藉各因時。

紡車

蠶月必紡績。絲車方挑擲。燈下絡緯鳴。林端河漢白。纖縷自有緒。虛輪運無跡。腕手已爲勞。誰經用刀尺。

龍梭

給給機上梭。往返如度日。一經復一絲。成寸遂成匹。虛腹銳兩端。素手投未出。陶家挂壁間。雷雨龍飛出。

織婦

織婦手不停。心與日月速。常憂里胥來。不待雞黍熟。但言督縣官。立要斷機軸。誰知公侯家。賜帛堆滿屋。

○上元從主人登尚書省東樓

閶闔前臨萬歲山。燭龍銜火夜珠還。高樓迴出星辰裏。曲蓋遙瞻紫翠間。軋軋車聲碾明月。參差蓮燄覓紅顏。誰教言語如鸚鵡。便著金籠密鎖關。

○自和

沉水香焚金博山。杜陵誰復與車還。馬尋綺陌知何曲。人在珠簾第幾間。法部樂聲長滿耳。上樽醇味易酡顏。更貧更賤皆能樂。十二重門不上關。

○又和

康莊咫尺有千山。欲問紫姑應已還。人似嫦娥來陌上。燈如明月在雲間。車頭小女雙垂髻。簾裏新妝一破顏。却下玉梯雞已唱。謾言齊客解偷關。

和公儀龍圖戲勉

五公雄筆廁其間。媿似丘陵擬泰山。豈意來朝飯顆句。忙中唯此是偷閑。

再和公儀龍圖

千重海浪漁人醉。百戰沙場野叟閑。豈向鬧中還得靜。乃知朝市即青山。

放鶉

獸烹羊。豬鳥烹鴨雞。唯鶉不殺。置奴而攜。公坐堂上。見而悲悽。急令開筴。還故棲。其間無力。飛不齊。公只知魚之洋洋。鵝之鵝鵝。噫兮噫兮。

莫登樓

莫登樓。脚力雖健。勞雙眸。下見紛紛馬與牛。馬矜鞍轡。牛服輶。露臺歌吹聲不休。腰鼓百面。紅臂鞦。先打六么。後梁州。棚簾夾道。多天柔。鮮衣壯僕。獰髭虬。寶搨呵叱。倚王侯。夸妍鬪豔。目已偷。天寒酒醺。誰爾侮。倚檻心往。形獨留。有此光景。無能遊。粉署深沉。空翠幃。青綾被冷。風颼颼。懷抱既如此。何須望樓頭。

莫飲酒

莫飲酒。酒豈讎。顏回不飲。不白頭。千種稱帝堯。百觚號聖丘。定國數石。無滯留。康成三百杯。未休。阮籍作詩語。更道聖賢在前。誰與謀。喉乾舌強。須潤柔。照見文字勝膏油。

依韻和永叔勸飲酒莫吟詩雜言

我生無所嗜。唯嗜酒與詩。一日舍此心腸悲。名存賢大
不輒思。甌空釜冷不俛眉。妻孥凍飢數恚之。但自吟醉
與世違。此外萬事皆莫知。王公謁請衆去早。既衰愈嬾
身到遲。日高倦僕顏色沮。况騎瘦馬兩耳垂。狀此勞苦
不喜出。唯有文字時能爲。諸公尚恐竭智慮。勤勤勸飲
莫我卑。再拜受公言。竊意公矯時。只愛詩。謂余癡。

和永叔內翰

來時擘繭正探官。走馬傳宣夾路看。便鑠青春春辭上閣。
徒知白日近長安。思歸有夢同誰說。強意題詩只自寬。
猶喜共量天下士。亦勝東野亦勝韓。

和公儀龍圖憶小鶴

聞憶華亭雙鶴雛。蒼毛未變頂微朱。閑情且與稻梁飽。
寄語休將雞鶩驅。丁令再歸移歲月。王褒端爲約僮奴。
主人必欲看雙舞。太液池寬肯放無。

和永叔內翰思白兔荅憶鶴雜言

醉翁在東堂。爲他栽桂樹。待將枝條與人折。憶著家中
玉色兔。夜看明月海上來。光彩離離入庭戶。且問嫦娥
一借觀。翁家雖有來無路。嫦娥對面幾萬里。不聲漸漸
西南去。是時翁生懷抱惡。却恨陸機先憶鶴。致令亦念
眼迷離。不似傍池能飲啄。始憂兔飢僮失哺。又恐白毛
塵土污。仍不如鶴有淺泉。自在引吭時刷羽。花前舉翅

鼓春風。只待翁歸向朝暮。我聞二公趣向殊。一養月中物。一養華亭雛。一畏奔海窟。一畏巢松株。我雖老矣無物惑。欲去東家看舞姝。

和永叔內翰戲荅

從他舞姝笑我老。笑終是喜不是惡。固勝兔子固勝鶴。四蹄撲握長啄啄。任看色與月光濕。只欲走飛情意薄。拘之以籠縻以索。必不似纖腰夸婢約。主人既賢豪。能使賓客樂。便歸膏面染髭鬚。從今晏會應頻數。

二月五日雪

二月狂風雪。寒威曉更加。省闈輕妒粉。苑樹暗添花。有夢皆蝴蝶。逢袍只紵麻。凍吟誰料我。相與賭流霞。

聞永叔謂子華

曰明日聖俞若無詩脩翰一杯酒

和公儀龍圖小桃花

三分春色一分休。始見桃花著樹頭。霰雪斗來如約勒。為公留作上林遊。

感李花

二月九日

重門雖鎖春風入。先折桃花後李花。赤白鬪妍思舊曲。舊聲傳在五王家。五王不見留華萼。華萼壞來碑缺落。當時李白欲騎鯨。醉向江南曾不錯。

琴高魚和公儀

大魚人騎上天去。留得小鱗來按觴。吾物吾鄉不須念。大官常膳有肥羊。

○嘗茶和公儀

都藍攜具向都堂。碾破雲團北焙香。湯嫩水輕花不散。
口甘神爽味偏長。莫夸李白仙人掌。且作盧仝走筆章。
亦欲清風生兩腋。從教吹去月輪傍。

宛陵先生文集卷第五十一

宛陵先生文集卷第五十二

刑部廳看竹效孟郊體和永叔

用其韻

蒼蒼庭中竹。事莫歎遲速。不同欄下草。一歲一迴綠。朝
開花照曜。暮落風相逐。何如飽霜雪。冬夏森寒玉。誰將
種官舍。本合近巖屋。不可一日無。瀟灑看未足。阮生豈
其愚。林中醉醺醺。我當明月時。移牀來此宿。

○較藝和王禹玉內翰

分庭荅拜士傾心。却下朱簾絕語音。白蟻戰來春日暖。
五星明處夜堂深。力搥頑石方逢玉。盡撥寒沙始見金。
澹墨牘名何日出。清明池苑可能尋。

○再和

廉纖小雨破花寒。野雀爭巢鬪作團。手卷白雲光引素。舌飛明月響傾盤。羣公錦繡為腸胃。獨我塵埃滿肺肝。彊應小詩無氣味。猶慙白髮廁郎官。

○ 謝永叔荅述舊之作和禹玉

天下才名罕有雙。今逢陸海與潘江。筆生造化多多辦。聲滿華夷一一降。金帶繫袍迴禁署。翠娥持燭侍吟窗。人間榮賈無如此。誰愛區區擁節幢。

○ 較藝贈永叔和禹玉

今看座主與門生。事事相同舉世榮。並直禁林司詔令。又來西省選豪英。飛龍借馬天邊下。光祿供醪月底傾。食葉蠶聲句偏美。當時曾記賦將成。

○ 戲荅持燭之句依韻和永叔

盧仝只有赤脚婢。吏部曾吟似笑仝。紅燭射眸從結客。清歌帖耳苦憐翁。歸時雖已過寒食。芳物猶能逐暖風。但點紗籠續清夜。西園遊興古何窮。

重荅和永叔

我家唯有一團月。挂在颼颼草屋東。玉兔已為公取玩。更休窺望桂叢中。

又依韻

多病相如不復云。更何曾有卓文君。他時我向會稽去。只是荆釵與布裙。

刑部廳海棠見贈依韻荅永叔二首

搖搖牆頭花。萋萋有好色。高枝笑粲粲。低枝明皜皜。但與風相撩。不與風相得。風吹莫苦急。游子歎日昊。彭祖與顏回。相去猶瞬息。每觀形影篇。曷在神所釋。不可廢我吟。畢竟焉免白。

搖搖牆頭花。一一如舞娥。春風買豔逸。豔逸此何多。不為游蜂撓。即為狂蝶過。日光苦給給。魯叟白波波。人生若朝菌。不飲奈老何。揚雄寂寞居。豈若阮生歌。

○ 春雨呈主文

蛟龍上漢魚潛動。梁棟生雲燕未知。風點稍聞寒瓦急。玉條初向畫簷垂。何郎夜聽應逢句。謝朓朝觀必有詩。老大莫將文字困。為公牽彊不勝疲。

謝鵬和公儀

聞有白鵬夢。遂作白鵬詩。詩記白鵬語。意公於鶴私。公意無薄厚。爾將聽我辭。朝給一瓢水。晝給一盞糜。曾不令爾渴。曾不令爾飢。事事不異鶴。安得於鶴疑。鶴鳴爾不和。鶴舞爾不隨。無以一供悅。飽食番頑癡。公所念爾久。李白當畜之。白固有篇詠。公偶未暇為。遣爾心不平。謂此鈍見遺。我持爾此意。請公吟莫遲。公便納我言。濡筆灑淋漓。書爾在南方。野羽霜雪披。弄啄紅豆實。飛上桄榔枝。翡翠不敢顧。孔雀不敢窺。將擬是白鳳。脩尾晝連漪。虺頸而雞首。我我如有儀。而今與鶴爭。此識固已卑。公初待爾厚。鵬兮知不知。

較藝將畢和禹玉

窗前高樹有棲鵲。記取明朝飛向東。家在望春門外住。
身居華省信難通。夜聞相府催張牘。曉聽都堂議奏中。
龍閣鳳池人漸隔。猶因朝謁望螭宮。
○送白鷗與永叔依韻和公儀
致鷗猶恐鷗飢渴。細織筠籠小瓦缸。玉兔精神憐已久。
金鑿人物世無雙。休爭白鶴臨清沼。且伴鳴雞向綠窗。
美羽奇毛有多少。爾身高穩勝他邦。

書事和韓子華舍人

見憑蝴蝶過牆飛。却夢翩然入綺闈。欲撲翅輕縈不住。
覺時疑有粉霑衣。

明經試大義多不通。有感依韻和范景仁舍人
明經與進士。皆欲取公卿。自是俗儒陋。非於吾道輕。昔
由羔鴈聘。今乃草萊并。不措一辭去。緣何祿代耕。

出省有日書事和永叔

辭家綵勝人為日。歸路梨花雨合晴。庭下鞦韆應未拆。
籠中鸚鵡即聞聲。千門走馬將看牘。廣市吹簫尚賣餠。
已是瓊林芳卉晚。不須遊處避門生。

定號依韻和禹玉

言出君門日。遙聞紫禁鐘。詔書中使降。駿馬上閑供。天
下持平手。毫偏不置胸。文從有司較。卷是近臣封。勝陣
無容敵。精兵已善攻。明朝當奏號。鴛鴦看歸雝。

寄桂州張諫議和永叔

桂林太守幾時行。泛汴桃花浪已騰。目極雲陰低遠樹。夜寒風急亂春燈。巢鳴翡翠愁無限。水宿鴛鴦冷不勝。陽朔山前好峰嶺。為公憐愛萬千層。

觀張中樂書大字

芝旭馳名世有孫。大書如曉過秋原。長松怪柏皆成炭。豫氏觀傍不解吞。

張淳叟獻詩永叔同永叔和之

張君獻詩詩詞巧。美女插花嬌醉春。公荅七言夸筍筍。我無千里學騏驎。夜吟謝朓澄江練。露濕陶潛漉酒巾。歸去應將錦囊貯。已勝珠玉莫愁貧。

上馬和公儀

煙火千門曉欲開。五花驕馬肯徘徊。井閭已是經時隔。親舊全如遠別來。帝闕重看多氣象。天街新霽少塵埃。振冠浣服無容久。便見池門放牘催。

太師杜公挽詞五首

國佐三公進。師臣一品歸。接賓忘素賢。還綬遠危機。憶奉追尊冊。當觀副輅旂。生榮人莫及。無恨掩泉扉。慶曆中改謚章

聖五后公奉冊乘副玉輅出宣德門

既老仍開國。因歸得賜金。念懷知主意。堅介見臣心。筆札尚存紙。性情猶託吟。向來門下客。東首淚盈襟。前歲因侍講王

內翰歸省其兄於睢陽上賜公金

莫怪露襟血。無由作弔賓。故池歸去鴈。春信見何人。已
寫虛堂影。猶鐫守冢麟。門生與舊吏。將立道傍珉。
言爲當代法。行不古人慙。天子賢元老。史官傳美談。名
高漢亞相。學嗣晉征南。有子即家寶。未嘗金玉貪。

見錄尋常詠。親裝復手題。言從永嘉後。重與建安齊。自
古難知己。孤生每擇棲。春風寄黃鳥。爲向墓間啼。

去歲同
在植郎

中謁公公出手
裝僕詩一軸

送方云秀才下第

從來釣者意。豈不在得魚。餌寡魚口多。曾非投竿疎。向
登百金賢。首尾必吹噓。竭澤古所戒。但保腹中書。風雷
變有時。且復歸孟豬。

送張待制知越州

滄海東邊會稽郡。朱輪遠下相臣家。已同雲漢星庭轉。
不與鑑湖風月賒。越箭抽萌供美茹。秦山堆翠照高牙。
買臣嚴助前時賢。破盜論功未足誇。

送甥蔡駟下第還廣平

爾持金錯刀。不入鵝眼貫。已遭俗弃擲。妄意堪憤惋。他
時有識別。終必爲寶玩。懷之歸河朔。慎勿輒鎔鍛。改作
毛遂錐。穎脫奚足算。

送唐紫微知蘇臺

洞庭五月水生寒。盧橘楊梅已滿盤。泰伯廟前看走馬。
闔閭城下見驂鸞。吳娃結束迎新守。府吏趨鏘拜上官。

曾過揚州能慣否。劉郎盞底勸須寬。

韓持國遺洛筍

龍孫春吐一尺芽。紫錦包玉離泥沙。金刀璀璨截嫩節。銅駝不與大梁賒。持寄韓郎綠蒲束。莫令衛女苦思家。韓郎才調偏能賦。分餉唯思楚景差。因之善謔誦淇澳。欲學報投無木瓜。

萊宣遺酒

白日對芳樹。靜夜愛明月。我飲雖不多。杯杓安可闕。破屋有空缸。冷竈無黔突。投餐聞韓辱。乞食使陶訥。鑒此不求人。終身其鏤骨。儻有佳客過。未免貫袍笏。風從東南來。語向西北發。西北多鳳雛。枝間報清越。玉壺盛曉露。贈置醉莫歇。却少可飲人。為告月休沒。

送王正卿寺丞赴睢陽幕

廢園孝王國。離宮天子都。古今雖且異。文物未嘗無。族有栽槐美。名從得桂殊。應聞漢丞相。待士倒樽壺。

韓玉汝遺油

朝讀百紙書。夜成幾篇書。明明白晝有。陽烏黝黝暗。室無蟾蜍目。睛須藉外物。光日月不到。卑鄙居君能。置以滑油壺。暝照文字燈。燄舒婦將膏。髮雲鬢梳。餅底濁濃留脂車。所益既如此。所感當何如。

王幾道罷磁州遺澄泥古瓦二硯

澄泥叢臺泥。瓦斲鄴宮瓦。共為几案用。相與筆墨假。賦

無左思作書媿右軍寫初從故人來來自邯鄲下物因人以重。謬當好事者。

送咸陽主簿王祕較

昔見蘭叢芽。今見連蔓瓜。持入咸陽市。本出故侯家。五色相鉤帶。秦人應自誇。行當七月薦。乞巧雜盤花。

和楚屯田同曾子固陸子履觀予堂前石榴花
堂下一匹鄭虔馬。欄邊兩株安石榴。但能有酒邀佳客。亦任狂花落素甌。俗女紅裙無好色。主人白髮自侵頭。欲歌翠樹芳條曲。已去洛陽三十秋。

送史供奉汴口都大

河為中國患。亦為中國利。其患齧隄防。其利通糧饋。分

流入浚汴。萬貨郡城萃。積淫或暴漲。旱暵或滯蹙。疏導欲其宜。經度有所異。曩者多邀功用之。殊未至十私。而五公歲久。害愈熾。潰溢必歸。尤廟堂難決議。明明聖天子。自選中常侍。銀璫插在貂。身小勇且智。上從廣武城。下及淮與泗。迴險帖鑿繇。所畫由所寄。嘗以勤厥身。又能和衆吏。前日有盡心。于今病憔悴。此職方藉人。加餐當自為。

呂晉叔著作遺新茶

四葉及王游共家。原坂嶺歲摘。建溪春爭先。取晴景大窠。有壯液所發。必奇穎。一朝團焙成。價與黃金逞。呂侯得鄉人分贈。我已幸。其贈幾何多。六色十五餅。每餅包

宛陵先生文集卷五十二
青籟紅籤纏素綵。屑之雲雪輕。啜已神魄惺。會待嘉客
來。侑談當畫永。

送畢甥之臨邛主簿

自我歷官三十年。有脚未曾行蜀川。李白嘗言道之艱。
險。長嗟難劇上青天。鳥悲猿號馬蹄脫。苔梯兩棧愁傾
顛。蒼崖下窺不見底。但聽雷聲輓石懸。湍濺曉盤青泥
上。高煙暮盤青泥到下泉。劔閣如劔嵬然割腸刺恨今
古連。爾去三千九百里。巴山小馬烏皮韉。一婦一奚行
李單。家具日貨能幾錢。人皆畏避不敢往。此獨敢往何
所便。况是初宦無遠適。心意自許非由銓。異乎哉我今
送爾徒哀憐。

依韻和公儀龍圖招諸公觀舞及畫三首

落花淨埽青陰長。野蝶閑飛綠草間。侍從退來看鶴舞。
便將樽酒欲招閒。

陰森園圃牆東地。攜挈兒童樹下吟。便約天邊鳳皇侶。
閱書觀畫味尤深。

初約看花花已盡。重新邀客客應歡。真花既不能長豔。
畫在霜紈更好看。

宛陵先生文集卷五十三

宛陵先生文集卷第五十三

送王介甫知毗陵

吳牛常畏熱。吳田常畏枯。有樹不蔭犢。有水不滋穠。孰
 知事春農。但知急秋租。太守追縣官。堂上怒奮鬚。縣官
 促里長。堂下鞭扑俱。不體天子仁。不恤黔首逋。借問彼
 為政。一一何所殊。今君請郡去。預喜民將蘇。每觀二千
 石。結束辭國都。絲鞵加錦緣。銀勒以金塗。兵吏擁後隊。
 劔撾盛前驅。君又不若此。革轡障泥烏。款行問風俗。低
 意騎更駑。下情靡不達。略細舉其麤。曾肯為眾異。亦罔
 為世趨。學詩聞已熟。愛棠理豈無。

送曾子固蘇軾

屈宋出於楚。王馬出於蜀。荀揚亦二國。自接大儒躅。各去百數年。高下非近局。鈞陳豹尾科。登俊何炳續。楚蜀得曾蘇。超然皆絕足。父子兄弟間。光輝自聯屬。古何相遼闊。今何相邇續。朝廷有巨公。講索無遺錄。正如唐虞時。元凱同啓沃。何言五百載。此論不可告。二君從茲歸。名價同驚俗。

送建州通判沈太博

昔聞醉翁吟。是沈夫子所作。今聽醉翁吟。是沈夫子所彈。聲如冰澌下石灘。嚼齧碎玉遶齒寒。四坐整衣容色端。醉翁雖醉無慢官。其音正以樂。其俗便且安。何害醕酖顏。渥丹沈夫子邂逅相遇必已歡。玉琴能寫人肺肝。人所爲難君不難。平明解船建谿去。輕齎快意不長湍。谿東白茗象月團。來奉至尊龍屈盤。餘爲帶銜與鬻片。散在六合雲漫漫。况君五臟清如水。宜飲沆瀣采木欄。更留瓦硯贈我看。鄴宮鴛鴦誰刻元。

送王平甫擬離騷

識君兮不早。君尚少兮我老。蘭與蕙兮多薰。葦雜佩兮芳芬。蘭倏往兮蕙隨。心俯仰兮徘徊。與識吳兮吳樂。嘗適楚兮楚悅。君何爲兮我闕。麒麟繫兮不馳。鳳皇蔽兮挑達。均莫悲兮別離。悵公子兮何之。絕大江兮無波。奉赤鯉兮藉荷。芼菹苻兮陳羹。親意得兮忘榮。世反是兮從賢。聊送君兮傷情。

送僧遊廬山

欲遊廬山去。將託楚舸梢。暮行長河曲。月上黃公坳。悠悠幾千里。身世非繫匏。恣觀瀑布虹。不畏潯陽蛟。誦經東林下。小宇結香茅。

韓持國再遺洛中斑竹筍

牡丹開盡桃花紅。斑筍迸林犀角豐。兩株遠寄川上鴻。韓郎輟口贈楚翁。便令剝錦煮荆玉。甘脆不道簞瓢空。小謝舊城昭亭下。侵天篁竹谿西東。螿娘生後出牙茁。羅列滿地爭強雄。是時楚翁所食寡。朝飯暮飯唯其充。今來得此謂過分。一賢一賤物苟同。

送僧惠思

大車高馬塵塞軌。弄石洗泉人不喜。慨然擺落還吳都。歸心勁於弦上矢。強弩發復開矢往。不可迴。常應笑燕子。時能海邊來。

送魯玉太博挽詞三首

射策志何遠。闔棺人共疑。奠觴朋友去。泣血母兄悲。霧氣窗間盡。車聲戶外知。玉樓成作記。此語可能欺。自昔稱王謝。于今亦盛門。尚看珠樹秀。應見玉麟存。書史辛勤學。文章苦死論。都然莫施設。恨向九原吞。試問於天下。誰從百歲心。短長從所盡。禍福乃相尋。只以名賓實。那論古至今。未能忘物境。空復歎人琴。

蘇明允木山

空山枯楠大蔽牛。霹靂夜落魚鳧洲。魚鳧水射幾千秋。
蠹肌爛隨沙蕩流。唯存堅骨蛟龍鏃。形如三山中雄酋。
左右兩峰相挾翊。尊奉君長無慢尤。蘇夫子見之驚且
異。買於溪叟憑貂裘。因嗟大不為梁棟。又歎殘不為薪
樵。雨侵蘇澀得石瘦。宜與夫子歸隱丘。

哀國子黃助教

儒者務欲博誦說。窮冬秋衣裙未及解。含珠以見求閩。
稱黃夫子常恐學不流。有徒如浮萍。匝匝圍剝舟。聚書
將萬卷。載行無馬牛。去年來京師。滿篋分寄投。半在吳
楚間。半入趙衛陬。昨日大官薦青袍。變綈裘。今朝為異
物。寸祿與命讎。獨聞邯鄲公。哀之使斂收。曷其稟賦薄。
安得被王侯。旅殯欲焉託。定將葬何州。生為四方遊。死
當不擇丘。豈必歸故鄉。萬里過山頭。

沅江李氏書堂

船從洞庭來。非賈即遊宦。宦賈事風檣。誰能樂清晏。不
如蓄書史。萬古無與間。上觀堯舜仁。下覽魏晉篡。善惡
彼既殊。智巧徒以辯。君心於此得。用舍不自慢。堂中羅
高廚。戶外望鳴鴈。菰菱可采掇。魚鼈可釣汕。卒歲身多
餘。世俗莫習慣。

張堯夫寺丞改葬挽詞三首

洛陽交舊裏過半。已凋殘。在昔義投漆。最先悲闔棺。誰
知二紀水重卜。九原安。聞說塞門路。白楊風更寒。

當時嗟遽歿。二子未能言。頻歲折丹桂。買塋遷陸渾。重
銘太史筆。不替故人恩。為善有終慶。此焉天意存。
舊墳為潤齧。新家得山深。斬木來荒路。移松出近岑。黃
鸝啼棘上。玉女問泉音。彊作挽人唱。儻知哀感心。

讀黃節推卷

磊落黃從事。清吟古氣多。少年知任俠。欲老解登科。辨
起公卿坐。時為慷慨歌。又持珠玉贈。將奈老貧何。

得陳天常屯田斑邛竹二枚

客初西蜀來。遺我雙邛竹。上有紅淚斑。斷非湘娥哭。嘗
聞帝魂哀。號血滴草木。春露灑更鮮。殷痕侵粉綠。截為
扶衰杖。萬里出洛谷。今來入我手。君勤意有囑。區區四

十年。重趼生兩足。冠巾三男子。且與詩書讀。翁雖文章
竊。尚以字遮目。忍弃不以教。攜歸事樵牧。故茲九節贈。
用助老追逐。楊朱非為岐。賈誼非為鵬。及其悲慟時。豈
不霑盈掬。揮之儻著物。無迹染林麓。因持此竹紋。勿歎
前人獨。

送余少卿知睦州

青山峽裏桐廬郡。七里灘頭太守船。雲霧未開藏宿鳥。
坡原將近見燒田。養茶摘蕊新春後。種橘收包小雪前。
民事蕭條官政簡。家書時問霅溪邊。

夜直廣文有感寄曾子固

日暮蛛絲動。月暗螢火明。方茲步庭戶。浩然懷友生。友

生將東歸。泛若赴海鯨。已從龍門出。不慕朱鼈輕。朱鼈
過吳洲。飛飛就東瀛。沈浮未可問。名有萬里程。須憂小
水魴。勞勞將尾頰。

○重送曾子固

楚澤多年一臥龍。新春雷雨起鱗蹤。誰知天上爭騰躍。
偶落池中雜唵喁。且自摧藏隨浪去。何當駕馭使雲從。
劉累只說古來有。暫屈泥蟠莫便慵。

寄題沈比部江州齊雲樓

遠目不高不可極。朱樓要與浮雲齊。江流萬古平決莽。
山雨一過寒淒迷。賈客檣下望吹笛。漁郎浦前看斷霓。
飲飛射蛟水花伏。高士種柳煙條低。羣鴈有時至自北。

洪潮到此不更西。君家隱侯有八詠。風雅未盡留人題。

雲間月

明明雲間月。皎皎莫可指。雄鳥與牡兔。萬歲不生子。三
旬後乃合。徒用成甲癸。焉見下土物。長養各私已。蛇蝎
滿窟隙。嗣毒自未已。天地豈有意。盛德名不死。

依韻和梅龍圖觀小錄

四百鸞皇羽翼成。高低輕重出權衡。他時俱作公卿去。
誇是王家門下生。

○送鮮于祕丞先通判黔州

壺頭山下俗。巴婦曲中聽。汲井熬鹽白。燒田種穀青。巖
風來虎嘯。江雨過龍腥。事簡能談者。揚雄所草經。

○依韻閩中孚職方暴雨幸涼
天津赫日欲焦拆。西北風來斗減威。太帝宮庭無暑入。
大明冠佩退朝歸。泠泠襲瑠璃簟。奕奕涼翻翡翠幃。
交扇不須煩素手。淋漓誰復汗頻揮。

愛月

終夜每愛月。見月常苦稀。不雨即雲晦。何能藉光輝。儻
有一夕明。豈畏露濕衣。素娥領玉兔。孤寡命亦微。堂堂
罕開耀。多是半掩扉。曾負萬家望。空似隨人歸。一歲復
一歲。白髮思釣磯。

呂縉叔云永嘉僧希用隱居能談史漢書講說
邀余寄之

奈苑談經者。蘭臺著作稱。吾儒不兼習。爾學若多能。每
愛前峰好。閑穿弊屐登。定將修史筆。添傳入高僧。

依韻和王景彝馬上忽見槐花

六月御溝馳道間。青槐花上夏雲山。退朝側帽驚時晚。
近樹聞香暗詠閑。新雨賈生車喜出。舊年潘岳鬢添班。
老慙太學無經術。空飽鹽疆往還。

送家靜寺丞知洛南

秦愛商於地。信美洛水南。銀鉛與丹砂。鑿山民爭貪。蜀
客善製錦。當先務桑蠶。衣老以及少。使煦如春酣。摘蔬
有筍蕨。釣庖有巖潭。頗同故鄉味。將喜獲所諳。

和王景彝省中詠孤竹

愛此孤生竹。碧葉琅玕柯。結根甘泉裏。豈必泰山阿。曾
莫學兔絲徒。以附女蘿風。為埽庭戶。夜月誰與過。

永叔內翰遺李太博家新生鴨脚

北人見鴨脚。南人見胡桃。識內不識外。疑若橡栗韜。鴨
脚類綠李。其名因葉高。吾鄉宣城郡。每以此為勞。種樹
三十年。結子防山獠。剥核手無膚。持置宮省曹。今喜生
都下。薦酒醞葡萄。初聞帝苑夸。又復主第褒。纍纍誰採
掇。玉碗上金螯。金螯文章宗。分贈我已叨。豈無異鄉感。
感此微物遭。一世走塵土。鬢顛得霜毛。

陸子履示秦篆寶

其文曰二十六年皇帝盡并兼天下諸侯
黔首大安號為皇帝乃詔丞相斯館法度

量則不一嫌疑
者皆明一之

秦既并諸侯。斯乃一度量。鑄寶以永傳。萬世俾勿喪。精
銅不生花。小篆著丞相。一歿咸陽宮。千秋事更王。陸君
居洛城。客有來渭上。曰因農人耕。發壤破古藏。遂獲此
物。還文完字何壯。始號為皇帝。立語已超曠。意將愚黔
首。釁起危博浪。其後同玉璽。不隨驪山葬。今蓄於君家。
徒爾資奇尚。物以用為珍。異時皆似妄。

王屋高送王屋知縣孫祕丞

王屋山高無猿獠。下有黃河水滔滔。天壇半夜見海白。
光動古邑雞先號。雞先號絕吠。爇巖居林棲。吏莫搔。山
膚有時得虞獵。不比羶肉烹連毛。聞君今去將效陶。縣
前種柳芟蓬蒿。不問公田問民俗。民安事簡教兒曹。河

南太守喜愷悌如此可以無馱勞

聽文都知吹簫

晏虞部遣求一見之

虞舜已去蒼梧野秦女駢鸞無復下簫管人間不解傳
帝樂部中能亦寡欲買小鬟試教之教坊供奉誰知者
晏識文公始致來勸接賤生宜彊且乃呼側坐吹一曲
驚顧頓嘶堂下馬吾妻閨中聞不聞穉女扳簾笑嬌妩
未敢多聽便遣還贈飲單杯向身瀉

雜言送王无咎及第後授江都尉先歸建昌

白袍來黃綬迴來跨蹇驢迴跨馬麻源三谷桂花開江
都作尉入風埃主人劉向西京才心如明月無不照恐
君已到還鸞臺

宛陵先生文集卷第五十三

宛陵先生文集卷第五十四

○ 依韻和王景彝憶秋

隴首欲看飛去雲。槎頭安得卷輕輪。流烏不轉西邊日。乘馬猶知果下人。空渴魏臺冰在井。從悲楚客淚緣巾。炎炎赫日偏憎老。眼耳昏聾半塞塵。

○ 七夕永叔內翰遺鄭州新酒言值內直不暇相邀

詰朝持鄭醞。向夕望星津。俗意願添巧。古心思變淳。予窮少陵老。公似謫仙人。獨對金鸞月。宮詞付小臣。

○ 依韻和永叔久在病告近方赴直道懷見寄二章

浴堂深殿近皇居。秋夕詞臣直宿初。宮女穿鍼爭落月。
官奴持燭看殘書。萬家乞巧心無盡。斜漢飛光望有餘。
枕上江山夢猶熟。五更寒雨過簾疎。
玉轡瓏瓏出絳宮。青槐馳道曉煙中。塵頭尚裊洗車雨。
馬耳前趨吹鬣風。聞說自將身許國。不須仍以醉爲公。
我今才薄都無用。六十棲棲未歎窮。

文豹篇贈黃介夫

壯哉南山豹。不畏白額虎。澤霧毛雖雜。鼯鼠朝將具鬣。
暮爲乳文章。子雲久已許。還笑大夫費五羖。天子仗中
儀勿舉。尾與旂常願看取。

送韓欽聖學士京西提刑

王朝慎常刑。恐民陷非辟。分命遣使車。謬枉得舉摘。兼
之勸農桑。欲野無曠隙。韓侯夙所志。功利豈止百。茫茫
唐鄧間。荒土無牛跡。邵闕廢未久。柘陽仍舊白。二地儻
復營。萬世不可易。昔在漢家時。近親多占籍。苟或非膏
腴。當應徒畿赤。每念輒歎嗟。未能俾盡畫。天將富斯民。
事與願不隔。其易謂何如。拾芥由琥珀。我今送韓侯。書
以贈無責。

送陸子履學士通判宿州

雷雨初過。草木新汴堤。楊柳綠陰勻。已看畫舸逐流水。
不惜長條折與人。淮境秋傳蟹螯美。郡齋涼愛蟻醅醇。
睢南莫久留才子。宣室歸來問鬼神。

得福州蔡君謨密學書并茶

薛老大字留山峰百尺倒插非人蹤其下長樂太守書
矯然變怪神淵龍薛老誰何果有意千古乃與奇筆逢
太守姓出東漢邕名齊晉魏王與鍾尺題寄我憐衰翁
刮青茗籠藤纏封紙中七十有一字丹砂鐵顆攢芙蓉
光照陋室恐飛去鏤以漆篋緘重重茶開片鈿碾葉白
亭午一啜驅昏慵顏生枕肱飲瓢水韓子飯齏居辟雍
雖窮且老不媿昔遠荷好事紓情棕

韓子華吳長文石昌言三舍人見訪

當時載酒客共過草玄人今日一寒士能來三侍臣竹
門容大馬金絡照諸鄰雞瘦莫為具阮家依舊貧

送吉老學士兩浙提刑

重本恤刑天子聖舟車持詔使臣賢部中漢吏無冤獄
對上吳人益美田重過故鄉逢故老一聞鳴鶴記山川
不須歌管唯詩酒况有餘杭白樂天

永叔內翰見訪

七月二十六日

內相能來顧為郎樂有餘兒童爭拂榻門巷劣容車掩
扇知秋意窺牆省舊書經年三枉駕未與故人疎

送石昌言舍人還蜀拜埽

紫微星宿何煌煌掖垣華閣上相當舍人亦與泰階近
兩兩聯裾如鴈行其間飛星入王壘天子賜告歸故鄉
錦韉金轡照棧去文園渴令難可望揚雄位卑纔執戟

豈有爵祿多文章。石公官顯職且賢。還家展墓酌椒漿。
太守趨塵里人避。岷山松柏風淒涼。椎牛行酒與耆舊。
耆舊醉歸呼此郎。公置名分共其樂。敦厚世俗時陶唐。
郎呼只作曩日視。安知鏘玉侍明光。歸來却向鳳池直。
詔言一出稱廟堂。廟堂蕭曹不草草。潤色鼓動辭琅琅。
鼇頭蓬萊便可到。蜀人更賀烹豬羊。

送劉元忠學士還南京

昔見相公登瀛洲。今見公子為校讎。鯤鵬變化三千載。
我生安得不白頭。君前拜恩父前慶。暫向南都乘順流。
南都留守頗為喜。將吏入賀鞞聲道。酒與銀甕羊羴炙。
上下和煦移涼秋。歸來却上柳堤路。西風健馬控花虬。

送潤州通判李屯田

過江始與風沙隔。京口山連北固牢。刺史丰儀於體重。
邦人全伏此名高。宴盤紫蟹方多味。古寺青林不厭遨。
定挈傳家舊圖籍。漕河應莫費吳艘。

寄題知儀州太保蒲中書齋

中條插遠近。黃河瀉直斜。蒲坂之城在其涯。渠渠碧瓦
十萬家。官商工農共擾擾。侯獨理齋窗照紗。侯方守邊
聽胡笳。滿屋蓄書凡幾車。他年不按清商樂。亦莫學種
東陵瓜。老繫戰馬向庭下。廚架整姪齊籤牙。朝聞鳴雞
夕聞鷄。眼昏秋匣生銅花。兒孫誦習且盈耳。客來休論
常山蛇。

8 哭孫明復殿丞三首

魯國先生歿夷門吉士哀因讒君席遠時賻帝恩該寂
寞萬宮啓悠揚茜旒迴昔賢皆不免松下作寒灰
舊業居東岱中年謁紫庭要塗無往跡至死守殘經詔
許求遺橐朋鄰與葬銘世人無怪我涕淚爲之零
自古春秋學皆知不可過生前恩禮少歿後薦章多妻
子將焉託田園有幾何汶陽秋樹裏黃鳥謾聽歌

程文簡公挽詞三首

嘗預巖廊政終爲社稷臣作藩安舊俗飲酒得賢人葬
禮饒簫咽明儀幣馬陳泉堂一經掩原上只麒麟
將相榮難及唐虞世已遭名將官愈大節固位同高哀

悼王朝輟鐫埋史筆操空山伊水外松柏冷蕭騷
關塞秋雲冷伊川苦霧陰薤歌金鐸碎蒿里石宮深燃
漆爲長夜栽松作茂林空留舊冠劍家廟四時心

送李殿丞通判蜀州

嘗聞蜀國海棠盛因送李侯宜有詩日愛西湖照空錦
醉看春雨洗燕脂郡無公事中園樂民喜羣邀匝樹窺
望帝鳥啼空有血相如人恨不同時晨鮮深淺非由染
解賦才華未得知聞說趙高今已老試教圖畫兩三枝

八月十夜廣文直聞永叔內當

聞向蓬萊宿鼇峰第幾層秋聲暗葉雨殘夢空堂燈推
枕感孤雁抽琴彈壞陵誰知廣文直桃簟冷於冰

和公儀龍圖新居栽竹二首

八月竹根移要雨。逢陰便向阮家求。請公靜聽蕭蕭葉。
斗變江南一夜秋。都城有地誰栽竹。只見寒樗與老槐。聞種琅玕向新第。
翠光秋影上屏來。

贈京西陳郎中

忽枉乘軺車。鏘然響金轡。駐軫與我言。琅琅有深意。乃
知故相家事業。已不墜。信哉渥洼種。千里可立致。顯祖
實令君。名聲取高位。伯叔與懿考。聯榮重當世。于今多
昆孫。朱紫紛曳地。勉勉崇令德。蘇李何難至。

送董著作知北海縣

君嘗佑王屬。議平天下刑。出宰得古邑。農鋤多帶經。素
琴伴飲酒。綠蘚生訟庭。舉手望海鴈。高懷在青冥。

送王微之學士知池州

秋江渺然生寒潮。北風吹帆上青霄。旗脚舒舒戰紅鬣。
旗心閃閃交阜鵬。檣下健兒發金鏡。屋上鸞童鳴紫簫。
岸傍舟人望且拜。溪口直入當高譙。正聞鼓角波動搖。
齊山舞翠挹宮堯。郭西猛虎夜莫入。太守號令如怒飈。
長戈椿爾喉。長刀斷爾腰。牙兵將吏無敢詔。新威烈烈
野火燒。

讀永叔集古錄目

古史書不足。磨璞鐫美辭。周宣石鼓文。已缺秦政嶧山

字苦隳。西漢都無半畫在。黃初而上猶得窺。下及隋唐
莫可數。奇言偉迹恐所遺。信都力黏大小軸。集十為秩
仍第之。隨目證訛甲癸推。青編是非皆究知。有益於古
今不疑。碑雖滅絕事弗移。後人覽錄尚若披。信都用意
無窮期。天灰地燼乃終畢。信都信都名愈出。

依韻和永叔秋日東城郊行

郊原物老莽然中。寓興驅車向國東。夾道名園迷屈曲。
壓枝秋實亂青紅。寒畦覆綠將收菜。野蝶雙飛尚繞叢。
田父欣來問行幸。依稀還似鬪雞翁。

送王景彝學士使粵

持節共知過碣石。銜蘆相背有飛鴻。地寒狐腋著不暖。

沙闊馬蹄行未窮。隴上牛羊衝密霰。帳前徒御立酸風。
歸時莫問程多少。却到河湟杏萼紅。

哭王畿道職方三首

前罷邯鄲守。孤高與世違。青雲舊知在。白首故園歸。既
歿無兒女。元貧只帳幃。平生洛陽友。從此更應稀。

我今過五十。萬事日消磨。孰識世間寡。故交泉下多。葉
秋知易隕。松耐竟如何。嘗亦悲前哲。荒墳野鼠窠。
得君音信近。安穩在緱山。不是國醫悞。寧辭蜀道艱。終
然有脩短。猶免歷間關。便作千秋別。露襟涕淚斑。

君當入
西川官

雖抱病無由免。待闕於緱氏。因
衄血國醫醫以藥下之。乘虛而卒。

依韻和楊直講九日有感

也持黃菊蕊時望白衣人首霜從來厭茱萸却乍親護
霜雲不散吹帽客何貧莫要悲搖落秋花更勝春

王侍講原叔挽詞三首

衣冠今盛族蘭玉舊嘉聲博古無遺悞遭時有重名魂
輿臨水發靈馬向郊鳴歸葬商丘外森森柏已成
稽古逢堯舜鏘金侍冕旒生負尊鄭學子舍預夔謀翰
苑事猶著岱宗魂已遊無情是天地玉樹掩蒿丘
丹旄秋風急清笳曉月寒明衣裛草露素士挽桐棺行
哭賓徒盛觀儀里巷殫空餘舊編在千載莫能刊

送公儀龍圖知杭州

在昔漢中微我祖入吳門公今領名都千騎擁高軒與

古異出處素節古本原江觀白馬潮水花長鯨奔山飄
月桂子天香一國繇壯奇已若此纖侈尚亦存舊聞其
風俗色易而柔溫太守朝駕車閭巷焚蘭蓀太守暮還
府燈燭照旗旛清歌延冠蓋廣湖浮酒樽成都與餘杭
天下莫比論彼為公故鄉此為公偃藩吏民宜寡事愷
悌有謠言

和楊直講夾竹花園

桃花天紅竹淨綠春風相間連溪谷花留蜂蝶竹有禽
三月江南看不足徐熙下筆能逼真璽素畫成纔六幅
萼繁葉密有向背枝瘦節疎有直曲年深粉剝見墨縱
描寫工夫始驚俗從初李氏國破亡圖書散入公侯族

公侯三世多衰微。竊貿擔頭由婢僕。太學楊君固甚貧。
直緣識別爭來鬻。朝質絳袍暮質琴。不憂明日鐙無粥。
裝成如得驪領珠。誰能更問龍牙軸。竹真似竹桃似桃。
不待生春長在目。

送李端明知河中府

才業人終服。聰明帝所聞。來希段干木。去識大馮君。
金絡鳴津口。朱旗點鴈羣。山河虞舊國。簫鼓漢橫汾。
古堞臨秋月。高樓等白雲。應同羊叔子。緩帶隔踞氛。

依韻和永叔內翰西齋手植菊花過節始開偶

書見寄

晝惜日易沈。夜惜月易曉。重陽種菊花。此意爾大好。所

嗟時節晚。又失澆培早。開榮獨是遲。造化徒費巧。霜前
擁繁萼。籬下同隕槁。微根發再綠。復笑王孫草。莊生語
鵬鷃。樂不計大小。能齊乃有餘。但恐知者少。常愛阮嗣
宗。遇酒醉則倒。杯中得賢趣。世上逐金梟。

依韻和丁學士陪諸公城東飲

黃花秋草滿荒臺。聯馬鳴珂未欲迴。上苑自將馳道隔。
高林空望白雲開。薦肴已去紗籠幕。賜醞新從蟻甕來。
天氣正清風景好。重門雖禁不辭杯。

宛陵先生文集卷第五十四

天扉玉靄風景秋重門雖禁不續林

高林空壁白雲開蕪青已去餘蕭景想歸條於難移來

黃芬煠草蕪荒臺細魚魚既未俗賦上茲自餘蠹宜聞

外贈味丁學士部諸公於東嶺

宗豔西箱俱園林中野賀賦世士避金臬

飄飄樂不信大小詣齊以首翁以恐味皆少常愛以解

蘇繁等鑿不同買蘇蘇蘇蘇蘇蘇蘇蘇蘇蘇蘇蘇蘇蘇蘇

聖相強知又夫藝皆早開樂圖是逐逐以去費以露前

卷之三